

Ina tiarza dall'energia vegn giu dil tetg igl avegnir

Sil baghetg dalla casa da tgira Puntreis a Mustér vegn installau il mument indrezs da fotovoltaica. Igl avegnir cuvieren ils 304 moduls ina tiarza dall'energia electrica che la casa consumescha.

HANS HUONDER/FMR

Ils prejis per energia electrica ein carschi marcantamein ils davos meins. Per quei motiv fa ei senn d'examinar scadinna pusseivladad da nezegiar las atgnas pusseivladads da producir energia. Quei fa la Fundaziun Puntreis a Mustér. Il mument vegn montau moduls sil tetg plat dil baghetg. Igl indrez che vegn proximamein en funcziun ha in recav annual d'energia electrica da 95 000 kw/uras. Quei corrispunda al diever da rodund 200 casadas ed enteifer Puntreis deriva aschia igl avegnir ina tiarza dall'energia da

quels moduls. Tenor *Adrian Bigliel*, ch'ei engaschaus cun si'interpresa vid l'installaziun dils indrezs, ei quella surfatscha da fotovoltaica ina dallas grondas sisum la Cadi.

Forza electrica ei daventada cara

Sco quei ch'il president dalla Fundaziun Puntreis, *Christoph Berger* di, ha la casa da tgira sbursau ils davos onns annualmein en media rodund 60 000 francs per energia electrica. Il davos temps ein ils prejis per l'energia carschi marcantamein: «Nus paghein il dubel da quei che nus pagavan entochen ussa.

Per cletg realisein nus quei implont fotovoltaic e savein aschia producir sez ina tiarza dall'electricitad. Quell'investiziun sepaga pia dublamein.» Ils cuosts per l'installaziun ed il material pils moduls sin tetg contonschan la summa da rodund 150 000 francs. Entochen ussa vegnevan ils dus baghetgs da Puntreis spigntai separadamein cun energia electrica. «En connex cun quellas lavurs cheu havein nus era decidiu da colligiar ils dus edificis, aschia che l'energia vegn furnida mo pli dad ina centrala. Aschia sa il diever d'energia vegnir optimaus», di *Christoph Berger*.



Ils moduls da fotovoltaica vegnan installai sil tetg da Puntreis.

FOTO MAD

Bulius egl uaul, sil caschiel ed ella medischina

Igl atun vargau ha giu liug a Cumbel la fiasta da bulius. Quella duei haver ina cuntinuaziun, denton buc en Lumnezia, mobein sum la Surselva. Il program previus sur treis dis la fin d'uost a Mustér tematisescha denton buca mo ils bulius che vegnan anflai en ed entuorn igl uaul, mobein era ils auters e da quels dat ei numerus ed interessants.

HANS HUONDER/FMR

Sch'ins tschontscha cheu tier nus da bulius, lu manegian ins en emprema lingia quels ch'ei d'anflar egl uaul: Bulius mellens, bulius tschep, parisols ni murachels. Egl uaul sco en auters loghens dat ei denton aunc biars auters: La meffa, il buliu sil caschiel e la ligiongia, ils bulius vid ils peis, bulius per la medischina ni era igl enconuschent buliu caschunau dalla bumba atomica. Mo lu era la biara litteratura ch'ei dat davart ils bulius. Il spectrum en ed entuorn il mund dils bulius ei pia fetg gronds e leutier fascinonts e porscha informaziuns, documentaziun e caschuns da discussiun pli u meins senza fin.

Cuntinuaziun da Cumbel

Stefan M. Seydel che habitescha a Mustér ei staus fascinaus dil program dalla fiasta da bulius il settember passau a Cumbel. «Jeu erel allura dil meini ch'ei duei dar ina cuntinuaziun da quella e sundel staus en contact per quei motiv cun *Alison Langley* da Lumbrein ch'ei stada involvida ella fiasta da Cumbel igl onn vargau. Il mund dils bulius ei aschi captivonts ch'ei fuss donn da buca cuntinuar cun quei tema cheu tier nus», di el sin damonda dalla FMR. Detg e fatg: Dils 26 entochen ils 28 d'uost 2022 duei haver liug sisum la Surselva la «Fiasta da bulius 2022». In center dat ei buca, la fiasta secumpona d'arranchaments che han liug en differents loghens. Pertuccont quella fiasta communichescha *Stefan Seydel* sur medias socialas: «Quels dis duein ils bulius star el center en nossa regiun. Quei ei in tem fetg fascinont e cura ch'ins entscheiva a sefatschentar dad el vegnan ins buca pli libers.»



La varietad da bulius – mussada a caschun dil festival da bulius digl onn vargau.

FOTO AUGUSTIN BEELI

Organisau, mo era spontan

Silla homepage fiasta-da-bulius.ch vegn comunicau successivamein tgei che ha liug nua. «Ina part dil program ei gia fixaus, mo tuttas bunas ideas en ina fuorma ni l'otra per cumpletar quel ein beinvegnidas, era aunc ils dis dalla fiasta», di *Stefan M. Seydel* e puntuescha: «Ei dat ina part organisada, mo lu segramein era sentupadas spontanias cun temas completons. Mintgin che ha ina bun'idea ei beinvegnius. Il tema sto semplamein haver da far zatgei cun bulius. Quella fiasta duei esser nuot commercial, ella duei porscher ina caschun da s'entupar, discussiunar e sedivertir.» In'egliada silla homepage muossa che las ideas da *Stefan Seydel* ein daveras fetg innovativas e specialas. Aschia vegn per exempel cusseligu alla gliעד ch'arriva il venderdis cul tren dallas 17.11 a

Mustér, da procurar per in velo per lu serender el liug dall'emprema sentupada.

La dumengia ils bulius d'uaul

Sco gia a Cumbel ei il mund dils bulius egl uaul era quella ga ina part essenziala dalla fiasta da bulius. Quella part ei prevedida la dumengia ell'Academia Viviana Stagiassur Mutschnengia. *Lia Heini-Piacentini* ed *Egmont Heisch* – dus specialists da bulius e controlladers ufficials – dattan in'investa profunda ella varietad dils bulius. La sentupada ei cuminada cun in'excursiun e silsuenter vegnan ils bulius anflai declarai. «Quella part dil program duei sensibilisar pil tema bulius, buca exnum igl encurir sco tal», di *Stefan Seydel*. Alla fiasta dil vitg a Mustér che ha liug miez uost vegn el ad informar davart la fiasta da bulius.

PREMI STEPHAN JAEGGI



Il premià designà *Arnold Spescha* amez la delegaziun grischuna a la radunanza svizra a Zug, (da san.) *Bernhard Inauen*, *Andy Kollegger* (president chantunal), *Simona Casaulta*, *Roland Federspiel* ed *Andri Poo*.

FOTO MAD

Grond'onur per Arnold Spescha

La davosa fin d'emna è stada a Zug la radunanza da delegads da l'Uniuon svizra da musica. A chaschun da quella han ins communigà che *Arnold Spescha* retschaivra quest onn il Premi Stephan Jaeggi. Igl è la pli auta distincziun da la musica instrumentala svizra. *Arnold Spescha* è commember d'onur da l'Uniuon chantunala da musica dal Grischun. L'uniun svizra l'undrescha cun il Premi Stephan Jaeggi ensemen cun il Tessinais *Carlo Balmelli*. La surdada dal premi è ils 28 d'avust 2022 a Cuir. Il premi sa referescha al dirigent e cumponist soloturnais *Stephan Jaeggi* (1903-1957). Quel ha gi gronds merits per la musica instrumentala svizra. Tranter auter ha el cumponi ils marschs famus «Fulenbacher» e «General-Guisan», el ha er dirigi cun grond success las musicas da las citads Berna, Olten e Solothurn. (cdm/fmr/abc)

BREIL



La suprastonza dalla fundaziun Brigel cun *Sep Cathomas* a caschun dalla surdada dil premi: (da sen.) *Anita Tuor*, *Veronica Cathomen*, *Sep Cathomas*, *Daniela Seiler* e *Marcellino Flury*. Silla foto maunca *Sur Sajan*.

FOTO MAD

Premi Brigel 2021 per Sep Cathomas

Sco engraziament per siu grond engaschi sur 50 onns en favur dil generalester en pleiv e vischnaunca vegn il politicher *Sep Cathomas* undraus cul Premi Brigel. Quei premi ei dotaus cun 1000 francs e vegn surdaus sporadicamein.

A caschun dalla radunanza generala dalla Pleiv Breil ha *Daniela Seiler-Albin*, la presidenta dalla donaziun Brigel, surdau il premi ed enumerau ils merets da *Sep Cathomas*. 1973 entscheiva igl engaschi da *Sep Cathomas* sco commember dil cussegl da vischnaunca. Pli tard vegn el elegius sco geru e president communal. Parallel eis el commember dil Cussegl grond e dil Cussegl nazional. Era sefa el meritevels sco president dalla Regiun Surselva ni dalla Casa Depuoz a Trun, mo era sco commember dil cussegl d'administraziun dallas Penticulars Breil-Vuorz-Andiast SA. Sin plaun internaziun ei *Sep Cathomas* activs sco commember dalla delegaziun svizra el congress dallas vischnauncas e regiuns europeicas. Dasperas presidescha el onns alla liunga pliras uniuns sportivas ni culturalas dalla vischnaunca ed actualmein era la Pleiv Breil; dil reminent gia per la secunda ga.

Il premi – ina part dalla donaziun Brigel

Il premi Brigel ei part dalla donaziun Brigel, ch'astga disponer d'ina biala summa da daners. Quels duein vegnir impundi per cass socials ni era pil beinstar dalla cuminanza. Els derivan ord l'ierta dil commerciant da textilia turitgès *Jürg Hermann Brigel* (1918-2003). Pervia da sia schlatteina *Brigel* ha el giu duront sia entira veta in stretg ligiom cun la vischnaunca Breil/Brigels. Quei ch'ins sa seregurda ha el passentau sias vacanzas a Breil. El ei morts senza descendenza ed ha testamentau la mesadad da siu fatg ad 11 instituziuns, repartidas en l'entira Svizra. Denter auter ha era la Pleiv Breil giu la cuida. L'ierta duei vegnir impundida per promover relaziuns vicendeivlas sco fundament da tutta convivenza en ina communidad.

Anterius purtaders dil premi Brigel ein: l'Uniuon sportiva *Danis/Tavanasa*, l'Uniuon da dunnas e mummas Breil, il Forum cultural, *Cornelia Deplazes* ed *Annadora Friberg* per la lavur vid igl usit da buania. (cdm/fmr)